

Na osnovu člana 43. Zakona o predškolskom odgoju i obrazovanju ("Službene novine Kantona Sarajevo" broj 4/98), člana 68. Zakona o osnovnom obrazovanju i odgoju ("Službene novine Kantona Sarajevo" broj 7/98) i člana 111. Zakona o srednjoškolskom obrazovanju ("Službene novine Kantona Sarajevo" broj 11/98), Zakona o izmjenama i dopunama Zakona o predškolskom odgoju i obrazovanju ("Službene novine Kantona Sarajevo" broj 9/2000), Zakona o izmjenama i dopunama Zakona o osnovnom obrazovanju i odgoju ("Službene novine Kantona Sarajevo" broj 9/2000) i Zakona o izmjenama i dopunama Zakona o srednjoškolskom obrazovanju ("Službene novine Kantona Sarajevo" broj 9/2000), ministar obrazovanja, nauke i informisanja donosi

PRAVILNIK

O POLAGANJU STRUČNOG ISPITA ODGAJATELJA, NASTAVNIKA I STRUČNIH SARADNIKA

Član 1.

Odgajatelji u predškolskim ustanovama, zavodima i domovima učenika, nastavnici i stručni saradnici u osnovnim i srednjim školama, koji prvi put zasnivaju radni odnos, obavezni su da nakon isteka jedne, a najviše dvije godine rada u neposrednom odgojno-obrazovnom radu polažustručni ispit.

Član 2.

Nastavnik koji u toku studija nijepolagao pedagoško-psihološku i didaktičko-metodičku grupu predmeta obavezan je da u roku jedne godine od zasnivanja radnog odnosa u obrazovnoj ustanovi položi predmete iz ove grupe koje u toku studija nije položio.

Rok za polaganjestručnog ispita nastavnika iz prethodnog stava se računa od dana kada su položili pedagoško-psihološku i didaktičko-metodičku grupu predmeta.

Član 3.

Stručni ispit se polaže pred komisijom koju imenuje ministar obrazovanja, nauke i informisanja Kantona Sarajevo (u daljem tekstu: Ministar) iz reda stručnih saradnika Ministarstva obrazovanja, nauke i informisanja Kantona Sarajevo (u daljem tekstu: Ministarstvo), nastavnika metodike na visokoškolskim ustanovama, profesora i nastavnika u osnovnim i srednjim školama i odgajatelja u predškolskim ustanovama.

Član 4.

Komisija se sastoji od predsjednika, ispitivača i stalnog člana, a za svakog člana komisije imenuje se i zamjenik. Kada se ispit sastoji iz više oblasti ispitivači se mijenjaju kao članovi komisije.

Član 5.

Nakon položenog stručnog ispita, odgajatelj, nastavnik i stručni saradnik stiče pravo da samostalno obavlja odgojno-obrazovni rad, odnosno drugi stručni rad u predškolskoj ustanovi, osnovnoj školi, srednjoj školi ili domu učenika.

Član 6.

Za polaganje stručnog ispita kandidat treba da ispuni slijedeće uslove:

- da ima stručnu spremu i profil utvrđen Nastavnim planom i programom za određeno radno mjesto za koje polaže stručni ispit,
- da ima položenu pedagoško-psihološku i didaktičko- -metodičku grupu predmeta na visokoškolskoj ustanovi za obrazovanje nastavnika,

- da ima odluku Nastavničkog vijeća, odnosno vijeća odgajatelja da je kandidat završio program stručnog usavršavanja i program pripreme za polaganje stručnog ispita,
- da ima najmanje jednu godinu neposrednog odgojno- obrazovnog rada, odnosno odgovarajućeg drugog stručnog rada u predškolskoj ustanovi, osnovnoj ili srednjoj školi.

Član 7.

Zahtjev za polaganje stručnog ispita podnosi se Ministarstvu, a može ga podnijeti: ustanova u kojoj kandidat radi, ili kandidat.

Uz zahtjev za polaganje stručnog ispita podnose se dokazi o ispunjavanju uslova iz člana 6. ovog pravilnika.

Član 8.

Stručni ispit se sastoji iz dva dijela:

- praktičnog dijela ispita sa metodikom i
- administrativnog dijela.

Član 9.

Nastavnik, u okviru praktičnog dijela ispita sa metodikom, drži čas sa planiranom nastavnom jedinicom, a nakon toga pristupa ispitu iz metodike nastavnog predmeta koji podrazumijeva osvrt na održani čas, kao i opću provjeru iz metodike na osnovu pitanja koja kandidat dobije izvlačenjem ceduljica sa pitanjima.

Praktični dio stručnog ispita za pedagoga i psihologa sastoji se iz:

- empirijskog istraživanja nekog od problema iz obrazovno odgojnog područja koje sadrži primjenu najmanje jedne od metoda i tehnika istraživanja, kao što su testovi sposobnosti ličnosti, znanja, upitnici i skale, na uzorku najmanje dva odjeljenja;
- izlaganja jedne od tema iz oblasti pedagogije, psihologije, mentalne higijene ili profesionalne orijentacije učenika (na času odjeljenske zajednice), nastavnicima (na nastavničkom vijeću) ili roditeljima (na odjeljenskom roditeljskom sastanaku).

Odgajatelj, u okviru praktičnog dijela ispita sa metodikom, drži čas sa planiranom nastavnom jedinicom, a nakon toga pristupa ispitu iz metodike nastave koji podrazumijeva osvrt na održani čas, kao i opću provjeru iz metodike na osnovu pitanja koja kandidat dobije izvlačenjem ceduljica sa pitanjima.

U okviru administrativnog dijela ispita, kandidat iz st.1., 2. i 3. odgovara na pitanja iz oblasti zakonodavno-pravne i administrativne regulative.

Broj ceduljica sa pitanjima iz st. 1. i 4. mora biti za pet veći od broja kandidata koji će u određenom terminu pristupiti ispitu.

Bibliotekari polažu stručni ispit u skladu sa odgovarajućim propisima iz njihove djelatnosti.

Član 10.

Svaki dio ispita se posebno ocjenjuje jednom od ocjena “položio-la je“ ili “nije položio-la“.

Stručna komisija utvrđuje ocjenu većinom glasova.

Praktični dio ispita je eliminatoran, pri čemu se kandidat može uputiti na popravni ispit iz dijela ovog ispita koji se odnosi na metodiku nastavnog predmeta.

Kandidat koji je upućen na popravni ispit iz metodike nastavnog predmeta ili administrativnog dijela, ovaj ispit može polagati najviše jedanput.

Kandidatu, koji iz oba dijela ispita u skladu sa ovim pravilnikom dobije ocjenu “položio-la je“, izdaje se uvjerenje o položenom stručnom ispitu na obrascu koji je sastavni dio ovog pravilnika.

Član 11.

Troškove za prvo polaganje stručnog ispita snosi ustanova u kojoj je kandidat zaposlen, a troškove ponovljenog ispita snosi sam kandidat.

Popravni ispit se ne smatra ponovljenim ispitom.

U slučaju da kandidat ne položi praktični dio ispita, ili popravni ispit, može ponoviti polaganje ispitajoš najviše jedan put u roku koji utvrdi stručna komisija, a koji ne može biti kraći od tri mjeseca od dana prethodnog polaganja.

Ako kandidat ne pristupi polaganju stručnog ispita, ili prije realizacije praktičnog dijela (održavanja nastavnog časa) izjavi da odustaje od stručnog ispita, smatra se da ispit nije polagao.

Ako kandidat odustane od već započetog stručnog ispita, smatra se da ispit nije položio.

Započeti stručni ispit, na pismeni zahtjev, može se odložiti ako je kandidat zbog bolesti ili drugih opravdanih razloga spriječen da nastavi ispit.

O odlaganju stručnog ispita odlučuje komisija većinom glasova, o čemu obavještava kandidata.

Član 12.

Radnici navedeni u članu 1. ovog pravilnika praktični dio ispita polažu u obrazovno-odgojnoj ustanovi istog nivoa obrazovanja kojem pripada ustanova u kojoj su trenutno zaposleni.

Jednom položen stručni ispit u skladu sa kriterijima iz ovog pravilnika priznaje se u svim odgojno-obrazovnim ustanovama Kantona Sarajevo.

Član 13.

O polaganju stručnog ispita vodi se zapisnik, na obrascu koji je sastavni dio ovog pravilnika, a potpisuju ga predsjednik, ispitivači i stalni član koji je ujedno i zapisničar.

Uz zapisnik iz stava 1. ovog člana prilaže se zahtjev kandidata za polaganje ispita, ovjeren prepis diplome i Odluka Nastavničkog vijeća, odnosno Vijeća vaspitača da je kandidat završio program obuke pripravnika.

Član 14.

O položenom stručnom ispitu vodi se matična knjiga izdatih uvjerenja, čija je vrijednost trajna.

U matičnoj knjizi izdatih uvjerenja unose se slijedeći podaci: ime i prezime kandidata, godina i mjesto rođenja, stručna sprema, vrijeme polaganja stručnog ispita, ocjena općeg uspjeha, broj, datum i mjesto izdavanja uvjerenja.

Član 15.

Rokove i ustanove u kojima će se obaviti polaganje stručnih ispita, kao i visinu naknade za polaganje stručnog ispita po kandidatu, određuje Ministar.

Član 16.

Kandidati iz drugih kantona mogu polagati stručni ispit u Kantonu Sarajevo, pod istim uslovima predviđenim ovim pravilnikom, ukoliko za to postoji dogovor Ministarstva sa odgovarajućim ministarstvom tog kantona.

Član 17.

Pravilnik stupa na snagu danom donošenja, a bit će objavljen u "Službenim novinama" Kantona Sarajevo.

Ministar prof. dr.Safet Halilović, s. r.

("Službene novine Kantona Sarajevo", broj 12/00, 10/01 i 22/04)

Na osnovu člana 43. Zakona o predškolskom odgoju i obrazovanju ("Službene novine Kantona Sarajevo", br. 4/98 i 9/2000), člana 68. Zakona o osnovnom obrazovanju i odgoju ("Službene novine Kantona Sarajevo", br. 7/98 i 9/2000) i člana 111. Zakona o srednjoškolskom obrazovanju ("Službene novine Kantona Sarajevo", br. 11/98 i 9/2000), ministar obrazovanja, nauke i informisanja Kantona Sarajevo, donio je

PRAVILNIK

O IZMJENAMA PRAVILNIKA O POLAGANJU STRUČNOG ISPITA ODGAJATELJA, NASTAVNIKA I STRUČNIH SARADNIKA

Član 1.

U Pravilniku o polaganju stručnog ispita odgajatelja, nastavnika i stručnih saradnika ("Službene novine Kantona Sarajevo", broj 12/2000), u članu 2. stav 2. se briše.

Član 2.

Ovaj pravilnik stupa na snagu osam dana nakon objavljivanja u "Službenim novinama Kantona Sarajevo".

Ministar Esma Hadžagić, s. r.

Na osnovu člana 80. Zakona o osnovnom odgoju i obrazovanju ("Službene novine Kantona Sarajevo", broj 10/04) i člana 123. Zakona o srednjem obrazovanju ("Službene novine Kantona Sarajevo", broj 10/04), ministar obrazovanja i nauke Kantona Sarajevo donosi

ODLUKU

O IZMJENI ČLANA 6. STAVA 4. PRAVILNIKA O POLAGANJU STRUČNOG ISPITA ODGAJATELJA, NASTAVNIKA I STRUČNIH SARADNIKA

član 6., stav 4. glasi: "Da ima najmanje 6 mjeseci a najviše jednu godinu neposrednog odgojno-obrazovnog rada odnosno odgovarajućeg drugog stručnog rada u predškolskoj ustanovi, osnovnoj ili srednjoj školi."

Ministar
doc. dr. **Emir Turkušić**, s. r.